

【经文信息】大正藏第 17 册 No. 0788

佛说较量数珠功德经 1 卷

No. 788 [No. 787]

佛说较量数珠功德经

大唐天竺三藏宝思惟译

尔时文殊师利法王子菩萨摩訶萨。为欲利益诸有情故。以大悲心告诸大众言。汝等善听我今演说。受持数珠较量功德获益差别若有诵念诸陀罗尼及佛名者。为欲自利及护他人。速求诸法得成验者。其数珠法应有如是须当受持。若用铁为数珠者。诵搯一遍得福五倍。若用赤铜为数珠者。诵搯一遍得福十倍。若用真珠珊瑚等为数珠者。诵搯一遍得福百倍。若用木槌子为数珠者。诵搯一遍得福千倍。若求往生诸佛净土及天宫者。应受此珠。若用莲子为数珠者。诵搯一遍得福万倍。若用因陀罗佉叉为数珠者。诵搯一遍得福百万倍。若用乌嚧陀罗佉叉为数珠者。诵搯一遍得福千万倍。若用水精为数珠者。诵搯一遍得福万万倍。若菩提子为数珠者。或用搯念或但手持。数诵一遍其福无量。不可算数难可较量。诸善男子其菩提子者。若复有人手持此珠。不能依法念诵佛名及陀罗尼。此善男子但能手持随身。行住坐卧所出言语若善若恶。斯由此人以持菩提子故。得福等同如念诸佛诵呪无异。获福无量。其数珠者。要当须满一百八颗。如其难得或为五十四。或二十七或十四亦皆得用。此即数珠法相差别。诸善男子。以何因缘我今独赞用菩提子获益最胜。诸人善听。我为汝等重说昔因。过去有佛出现于世。在此树下成等正觉。时一外道信邪倒见毁谤三宝。彼有一男忽被非人打杀。外道念言我今邪盛。未审诸佛有何神力。如来既是在此树下成等正觉。若佛是圣树应有感。即将亡子卧着菩提树下。作如是言。佛树若圣我子必苏。以经七日诵念佛名。其子乃得重苏。外道赞言。诸佛神力我未曾见。佛成道树现此希奇。甚大威德难可思议。诸外道等悉舍邪归正发菩提心。信知佛力不可思议。诸人咸号为延命树。以此因缘有其二名。应当知之。我为汝等视其所要。说此语已。佛言善哉善哉文殊师利法王子。如汝所说一无有异。一切大众闻此持珠较量功德。皆大欢喜信受奉行。

佛说校量数珠功德经

【经文信息】大正藏第 17 册 No. 0788 佛说校量数珠功德经

【版本记录】CBETA 电子佛典 Rev. 1.8 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 维习安大德提供之高丽藏 CD 经文, 北美某大德提供

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】
